

Gaeb Duznyungz



环江思恩镇西南小学 韦海椰

Seizhah daengz lo, ranz gou couh miz bouxhek mbouj cingj gag daeuj — duznyungz. Duznyungz youq ranz gou, yaep ndeu youq baihnaj gou mbin gvaq, yaep ndeu youh daj laj ga gou ndonj gvaq, daegbied dwg byonghhwnz cingq ninzndaek seiz, duznyungz youh daeuj haeb, bek youh bek mbouj ndaej dawz, duznyungz youq henz rwz gongznye' nye, hawj vunz engq ninz mbouj ndaek. Gwnz ndang gou seiz mbouj seiz couh deng duznyungz haeb ndaej hwnj baenz aen baenz aen nwnj. Daxmeh yawjraen le gig sim' in, couh ndaq naeuz: “Duznyungz

dwgcaengz neix! Gou yaek mied de cij ndaej.”

Vihliux siumied duznyungz, gou caeuq daxboh daxmeh couh itheij gaeb duznyungz. Gou dawz ceijnemnyungz baij youq gwnz daiz, maqmuengh miz duznyungz mbin gvaq couh deng nem dawz, couh ndaej siumied duznyungz lo. Daxboh ndaw fwngz gaem fag-gaebnyungz, daxmeh fwngz gaem bingzyw gajnyungz, yaek dawz duznyungz gaj cied bae. Bwh ndei lo, gou couh hainduj ra duznyungz, gou yawjraen gwnz cueng miz song duz nyungz, couh lumj song bouxvunz cingq caeg gangj vah ne? Gou sim

siengi: “Sou vaiq di dawz vah gangj sat, mboujne couh mbouj ndaej gangj lo. Gou itdingh dawz sou siumied bae.” Gou yaengyaeng byaij daengz henz cueng, doiq cinj duznyungz couh yungh rengz bek, sim siengi: “Duznyungz ha duznyungz, baezneix mwngz deuz gizlawz bae.” Gou menhmenh hai fajfwngz daeuj yawj, ndaw fwngz gijmaz cungj mbouj miz, duznyungz mbouj rox seizlawz caeg deuz lo, ai, gaeb duznyungz caen mbouj yungzheih ha! Yawjyawj daxboh, cij raen daxboh duetdin menhmenh byaij gyawj densi, yienzlaiz gwnz densi miz duz nyungz



ndeu, daxboh “ba” couh bek gvaqbae, hoeng cij bek deng fwed duznyungz. Daxmeh yawjraen le, youh hozndat youh ndeiri, daxmeh naeuz: “Sou ndwn baih ndeu bae, yawj gou baenzlawz gaj duznyungz.” Cij raen daxmeh gaem hwnj bingz ywgajnyungz, doiq cinj duznyungz couh byoq gvaqbae. Baezneix caen miz yungh lo, duznyungz doek roengzdaej lo. Gou caeuq daxboh boiqfug daxmeh lai lo.

Ai, gaeb duznyungz caen mbouj yungzheih ha!

Veh Gyaeg

画蛋

“Ngoenzneix cozyez ma ranz sij dwg veh gyaeggaeq.”

Lauxsae duzyiengz ngamq senhbu, gyoengq doengzhag couh mwngz coenz gou coenz ngeixlwnh hwnjdaej: “Baenzlawz veh ha?” “Yungzheih veh hane, veh aen luenz he couh ndaej lo.” Lauxsae duzyiengz naeuz: “Yawj lumj yungzheih, yaek veh ndei mbouj yungzheih bw. Ngoenzcog gou cingj boux bingzveij saenzmaed he daeuj dang bingzveij, yawj byawz veh ndaej ndei.”

Duzlingz yawjyawj aenmakdauz, gyaeggaeq dwg luenz, makdauz caeuq yiengh luenz ca mbouj geijlai, yienghneix de couh ciuq yiengh makdauz nyinhcaen bae veh.

Duzdouq yawjyawj lauxbaegnding, lauxbaegnding luenzlili, caeuq gyaeggaeq ca mbouj geijlai, yienghneix de ciuq yiengh lauxbaegnding nyinhcaen bae veh.

Noucoengz gag siengi: Gyaeggaeq dwg mehsimj gaeq ok okdaej, de itdingh rox baenzlawz veh. Yienghneix de ra daengz mehsimj gaeq. Mehsimj gaeq hawj noucoengz aen gyaeg he, heuh de sijsaeq cazyawj miz maz daegdiemj le caiq veh.

Ngoenz daihngaih, gyoengq doengzhag aeu mbawveh gyau hawj lauxsae duzyiengz. Lauxsae duzyiengz cingj bingzveij saenzmaed mehsimj gaeq okdaej. Mehsimj gaeq dawz hwnj gij veh daihgya veh haenx, baenz mbaw baenz mbaw sijsaeq yawj, duzlingz veh haenx dwg makdauz mbouj miz gaenq, duzdouq dwg veh lauxbaeg mbouj miz mbaw, mehsimj gaeq ngauzngauz gyaeg.

“Couh mbaw neix veh ndaej ndei.” Mehsimj gaeq aeu mbawveh noucoengz hawj gyoengq doengzhag yawj: Gyaeg he luenz, gyaeg he iq, daengx ndang raeuzrdrwd.

Lauxsae duzyiengz naeuz: “Mbouj sijsaeq cazyawj couh veh mbouj lumj bw.” Gyoengq doengzhag ngaekngaek gyaeg, cungj rox lo.

(ngeih nienzgaep Banh Yij)

Bineix hajit gyajgeiz, daengx ranz dou bae lijyouz.

Daxboh hai ci daengz gyahyouzcan gya le 210 maenz youz. Moix swng youz 7 maenz. Daxboh doiq gou naeuz: “Raeuz daengz giz bae youz haenx yaek hai 420 cienmij ci, moix swng youz daih'iek hai ndaej 13 cienmij. Mwngz suenqsuenq mbat he, gou haxbaenh gya gij youz haenx gaeuq yungh lwi?”

Gou naemj yaep he, siengi ok sam cungj suenqfap.

Cungj suenqfap daih'it dwg: Sien suenq ok 210 maenz gya ndaej geijlai swng youz, caiq suenq ok gij youz neix hai ndaej geijlai cienmij. $210 \div 7 = 30$ (swng), $30 \times 13 = 390$ (cienmij), hoeng

suyoz henz ndang

Youz Gaeuq Yungh Lwi

油够用吗

daengz gizdieg bae youz dwg 420 cienmij, $390 < 420$, ndigah daxboh gya gij youz haenx mbouj gaeuq yungh.

Cungj suenqfap daihngaih: Daengz gizdieg bae youz haenx miz 420 cienmij, moix swng youz hai ndaej 13 cienmij, yienghneix couh yaek yungh $420 \div 13 \approx 32.3$ (swng) youz, daxboh gya le $210 \div 7 = 30$ (swng) youz, $30 < 32.3$, ndigah daxboh gya gij youz haenx mbouj gaeuq

yungh.

Cungj suenqfap daihsam: Daxboh gya le $210 \div 7 = 30$ (swng) youz, ci yaek hai daengz gizdieg bae youz, moix swng youz couh yaek hai $420 \div 30 = 14$ (cienmienj). Hoeng moix swng youz daih'iek hai ndaej 13 cienmij, $13 < 14$, ndigah daxboh gya gij youz haenx mbouj gaeuq yungh.


Gyoengq doengzhag, sou lij siengi ok suenqfap wnq lwi?

(seiqnienzgaep Lij Yijih)

“Ciet Loenghvunz” Ngoenz Haenx

“愚人节”那天

贵港市覃塘区蒙公乡高占小学三(1)班 黄莹



Moix bi 4 nyied 1 hau ngoenz haenx dwg ngoenz “ciet loenghvunz”, “ciet loenghvunz” dwg daj 19 sigij hainduj youq ndaw bekking Saefueng guekgya hwnghwnj. Ngoenz haenx gyoengqvunz aeu gak cungj fuengsik loenghriu daej dox-yaeuh caeuq doxloengh.

Miz bi ndeu, daengz ngoenz “ciet loenghvunz”, gou bonjlaiz

siengi loengh daeggo caeuq daxmeh, hoeng, ngoenzde gvaq-bae le, gou cix mbouj loengh daengz gyoengqde.

Ngoenz haenx yanghaet, daxmeh bang gou daenj buhvaq, gou doiq daxmeh naeuz: “Daxmeh, mwngz rox ngoenz-neix dwg gijmaz ciet lwi? Dwg ‘ciet loenghvunz’ bw!” Daxmeh naeuz: “Mwngz loengh vunz loengh ndaej sim' angq di, gaej loengh ndaej gvaqbouh bw.”

Gou caeuq daeggo caez bae hagdangz, youq gwnz loh, gou ndawsim naemj: Loenghloengh daeggo ba! Fanjcingq ngoenzneix dwg ngoenz “ciet loenghvunz”, gou hix mbouj lau de doiq gou fatheiq. Daeggo sawqmwh doiq gou naeuz: “Daehsaw mwngz miz di naek, mwngz lij iq, aemq mbouj ndaej baenzneix naek, gou

bang mwngz aemq ba.” Gou angq naeuz: “Ndae ha.” Raen daeggo doiq gou baenzneix ndei, de ciengzciengz bang gou, gvansim gou, gou sawqmwh mbouj gamj loengh daeggo lo. Naemj daengz loengh mbouj ndaej daeggo lo, daihngaih aen moegbiu—daxmeh!

Cuengqhag seiz, gou byaij ok bakdou hagdangz, yawjraen daxmeh cingq ndwn youq bakdou. “Daxmeh, ngoenzneix mwngz mbouj dwg gyaban ha? Vih gijmaz ndaej hoengq daej ciep gou ne?” Daxmeh naeuz: “Gyaban hix daej ciep mwngz ya!” Dingq daengz daxmeh baenzneix gangj, gou hix mbouj gamj loengh daxmeh lo. Daengz seizneix gou cungj mbouj gamj loengh vunz caeuq yaeuh vunz ne. (指导老师:韦江萍)